

Ilinniarnertuunngorniartunik ilinniartunngortitsisarneq pillugu Namminersorlutik Oqartussat nalunaarutaat

Ilinniarnertuunngorniartarneq pillugu Inatsisartut inatsisaanni nr. 13, 22. november 2011-imeersumi Inatsisartut inatsisaat nr. 16, 27. november 2020-meersukkut allanngortinneqartumi § 5, imm. 2, aamma § 6, imm. 2, aamma § 8, imm. 3 aamma 4, § 11, imm. 5 kiisalu § 14 naapertorlugit aalajangersarneqarput:

Kapitali 1

Ilinniartunngorsinnaanermut ilinniartunngortitsinermullu piumasaqaatit immikkut ittut aamma karakterinik naatsorsueqqittarneq

§ 1. Qinnuteqartut Kalaallit Nunaanni aalajangersimasumik najugaqanngitsut ilinniarnertuunngorniartunni ilinniartunngortinneqarsinnaapput qinnuteqartoq qinnuteqartunut Kalaallit Nunaanni aalajangersimasumik najugaqartunut piumasaqaatit qaffaseqataannik tunngaviumik ilinniarnermi ilinniakkatigut pisinnaasaqartoq Ilinniartitaanermut Naalakkersuisoqarfik naliliippat.

§ 2. Qinnuteqartunut Greenlandic Grading System-skala malillugu naliliiffigineqanngitsunut ilanngussami 1-imi naatsorsueqqinnermut tabeli aalajangersarneqartoq malillugu naatsorsueqqittoqassaaq.

Imm. 2. Qinnuteqartunut ilanngussaq 1-imi naatsorsueqqinnermut tabelitut aalajangersarneqartumut ilaanngitsut Ilinniartitaanermut Naalakkersuisoqarfiup naliliinera tunngavigalugu naatsorsueqqittoqassaaq.

Kapitali 2

Qinnuteqarnermi periutsit

§ 3. Ilinniarnertuunngorniartunni ilinniartunngorniartunni qinnuteqarneq ukiumi ilinniarnernup aallartiffissaani kingusinnerpaamik 1. marts pisarpoq.

§ 4. Qinnuteqarnermi immersugassaq Ilinniartitaanermut Naalakkersuisoqarfimmit akuerisaasoq atorlugu ilinniartunngornissamik qinnuteqartoqassaaq.

Imm. 2. Ilinniarnertuunngorniartunni sorlermi ilinniartunngornissamik qinnuteqarnerluni qinnuteqartup qinnuteqarnermini ilinniakkap normua ilisimatitsissutigissavaa. Qinnuteqartoq arlalinnik kissaateqaruni taakku tulleriinnilersorneri qinnuteqartup allassavai.

Imm. 3. Ilinniarnertuunngorniartarneq pillugu Inatsisartut inatsisaanni § 11, imm. 2-mi malittarisassat

aallaaviginagit ilinniarnertuunngorniarmimmi allami ilinniartunngornissaq kissaatigineqarpat tamassumunnga ilinniakkatigut inuttullu tunngavilersuutit qinnuteqartup allassavai.

Imm. 4. Tunngaviummik ilinniarnertup kingorna ilinniakkat sammiviini sorliup toqqarnissaanik ilimagisani siumut pituttuutaanngitsumik qinnuteqartup qinnuteqaammimi nalunaarutigeriissavaa.

Imm. 5. Qinnuteqaat qinnuteqartumit atsiorneqassaaq. Qinnuteqartoq angajoqqaatut oqartussaassusilinnit oqartussaaffigineqarpat qinnuteqaat aamma angajoqqaatut oqartussaassusilinnit atsiorneqassaaq.

§ 5. Ilinniagalernissamik qinnuteqaat ugguuna pissaaq www.sullissivik.gl, imaluunniit qinnuteqaateqartup angerlarsimaffigalugu kommuniani Majoriamut qinnuteqaat immersorsimasooq nassiunneqarsinnaavoq.

Imm. 2. Qinnuteqartut qinnuteqarnermi nalaanni Kalaallit Nunaata avataani aalajangersimasumik najugaqartut akuerisaanissaannut atatillugu kommuni ilaqutariittut attuumassuteqarfiginerusaaq angerlarsimaffittut naatsorsuunneqassaaq.

Imm. 3. Qinnuteqartut angajoqqaatut oqartussaassuseqartunit oqartussaaffigineqartut ilaqutariinnikkut attuumassuteqarfiat nalinginnaasumik tassaassaaq angajoqqaatut oqartussaassusillit aalajangersimasumik angerlarsimaffigisaat.

Imm. 4. Qinnuteqartut angajoqqaatut oqartussaassusilinnit oqartussaaffigineqanngitsut ilaqutariinnikkut attuumassuteqarfiat nalinginnaasumik tassaassaaq Kalaallit Nunaanni kingullermik aalajangersimasumik najugaqarfiat.

§ 6. Ilinnialernissamik akuerineqarnermut tunngatillugu Avannaata Kommunianit qinnuteqartut Kommune Qeqertalik najugarisatut kommunerisaattut isigineqassaaq.

§ 7. Qinnuteqaateqartup kommunerisaani Majoriami kingusinnerpaamik 15. martsimi immersuiffissami paasissutissat attuumassuteqartut tamaasa elektroniskimik paasissutissaasivimmut IT-regimut ikkussuunneqassapput.

§ 8. Ilinniarnertuunngorniarmimmi qinnuteqartut ilinniartunngornissamik salliutillugu qinnuteqarfigisaanni rektorip ilinniartunngornissamik misilitsinneq aamma napparsimanerup kingorna misilitsinneq qaqugu ingerlanneqassanersut misilitsinnikkut ilinniartunngornissamik qinnuteqartut kingusinnerpaamik 22. marts nalunaarfigissavai, misilitsinneq sumi ingerlanneqassanersoq misilitsinnissamullu paasissutissat allat pillugit.

Imm. 2. Qinnuteqaateqartut sumi pingaarnertut qinnuteqarfigisimasaani Ilinniarnertuunngorniarmimmi rektori elektroniskimik paasissutissaasivimmut IT-regimi ilinniarnertuunngorniartussanik ilinniartunngortuni killiffiit nutartertassavai. Tamanna ilutigalugu allakkat assiligneqarnerat qinnuteqartup angerlarsimaffigisaani Majoriamut nassiutissavai.

§ 9. Ilinniarnertuunngorniarmimmi qinnuteqaateqartup pingaarnertut qinnuteqarfigisimasaani rektor kingusinnerpaamik 1. maj imatut nalunaaruteqassaaq:

- 1) inatsisitigut piumasaqaatikkut qinnuteqartoq akuerineqarpoq, Ilinniartunngorniartarnek pillugu Inatsisartut inatsisaanni § 8, imm. 1 tak., taamaattoorli imm. 2 aamma tak.,
- 2) qinnuteqartoq immikkut ittumik akuersissuteqarnikkut ilinniarnertuunngorniarnissaminut

akuerineqarpoq, Ilinniarnertuunngorniartarneq pillugu Inatsisartut inatsisaanni § 8, imm. 2 tak.,
taamaattoorli imm. 2 tak.,

3) qinnuteqartoq ilinniartunngornissaminut misilitsikkami angusivoq, Ilinniartunngorniartarneq pillugu Inatsisartut inatsisaanni § 8, imm. 2 tak., aamma inissaqaruni ilinniartunngussaaq. Tamanna ilutigalugu qinnuteqartoq ilumut inaarutaasumik aamma sumi ilinniarnertuunngorniartarneq aallartissanersoq pillugit nalunaarfigineqassaaq, Ilinniartunngorniartarneq pillugu Inatsisartut inatsisaanni § 9, imm. 1 tak.,

4) qinnuteqartup akuerineqarnissaminut misilitsikkami angusinnigilaq taamaattumik itigartitsineq nalunaarutigineqarpoq, Ilinniartunngorniartarneq pillugu Inatsisartut inatsisaanni § 9, imm. 1 tak., imaluunniit

5) qinnuteqaat ilinniarnertuunngorniartarneq allamut tassani suliarineqartussanngorlugu nassiunneqarpoq,

Imm. 2. Qinnuteqartut piffissami qinnuteqarfusumi suli meeqqat atuarfianni naammassinngitsut imaluunniit meeqqat atuarfianni nalinginnaasumik piumasaqaatit assinginik ilinniarnermik naammassinngitsut inaarutaasumik misilitsinnerni killiffinnilu karakterini minnerpaamik karakterissatut aalajangersakkat anguneqarnissaat piumasaqaatigalugu ilinniartunngorsinnaanernik nalunaarfigineqarsinnaapput.

Imm. 3. Tamanna ilutigalugu qinnuteqartut ilinniartunngornissamik nalunaarfigineqarsimasut ilinniarnertuunngorniartarneq sorlermi aallartinnissartik pillugu nalunaarfigineqassapput, imm. 1, nr. 1 imaluunniit 2 tak..

§ 10. Ilinniarnertuunngorniartarneq qinnuteqartut ilinniartunngornissamik salliutillugu qinnuteqarfigisaanni rektorip qinnuteqartut piumasaqaateqarluni ilinniartunngorsinnaanermik imaluunniit naammattumik inissaqarnersoq apeqquataatillugu ilinniartunngorsinnaanermik siusinnerusukkut nalunaarfigineqarnikut inaarutaasumik ilinniartunngortinneqarnersut kingusinnerpaamik 1. juli inaarutaasumik nalunaarfigissavai.

Imm. 2. Qinnuteqartut naammattunik inissaqarnissaq apeqquataatillugu ilinniartunngornissamik siusinnerusukkut nalunaarfigineqarsimasut inaarutaasumillu ilinniartunngunngitsut utaqqisuni salliutitassanut ilanngunneqartut nalunaarfigineqassapput.

Imm. 3. Qinnuteqartut utaqqisunik tullerriaarilluni allattuiffimmiittut ilinniartunngortinneqartunik ilinniartunngortinneqarnissamik kissaateqarnermik taamaatitsiinnartoqarpat imaluunniit ilinniarnernup aallartinnerani ilinniarnermi aallartittoqanngippat tullerriaarineq malillugu ilinniartunngortinneqarnissamik neqeroorfigineqassapput, § 11 tak.

§ 11. Qinnuteqartut ilinniartunngortinneqarnermik nalunaarfigineqarsimasut ilinniarnernup aallartinnerani ilinniarneq aallartissavaat.

Imm. 2. Qinnuteqartoq ilinniarnernup aallartinnerani ilinniarnermik aallartitsinissamik kissaateqanngikkuni ilinniartunngornissamik nutaamik qinnuteqassaaq.

Imm. 3. Pissutsit immikkut ittut tamassuminnga tunngavissaqartitsippata ilinniarnernup aallartinnerata kinguinngua ilinniarnernup aallartinneqarnissaa rektorip akuersissutigisinnavaa.

Kapitali 3

Ilinnialernissamut misilitsinneq

§ 12. Ilinniartunngorniarluni misilitsinneq, tassunga ilanngullugu napparsimareernermi misilitsinneq, tak. § 15, imm. 2, Ilinniartitaanermut Naalakkersuisoqarfimmit aaqqissuuneqassaaq nalilersorneqarlunilu.

Imm. 2. Misilitsinnermi angusat misilitsinnerup kingorna kingusinnerpaamik sapaatit akunneri marluk qaangiunneranni nalilersorneqareersimassapput ilinniarnertuunngorniarfinnullu nalunaarutigineqareersimassallutik.

§ 13. Ilinniartunngorniarluni misilitsinneq imaqarpoq allattarissamik misilitsinnermik ataatsimik ataatsimoortumik, meeqqat atuarfianni angajullit ilinniagaanni qinnuteqartup pisinnaasaanik misiliinerusok.

Imm. 2. Ilinniartunngorniarluni misilitsinneq ilinniakkani tamani suliaassanik imaqassaaq, pingaarnerutinneqassallutilli ilinniakkani kalaallisut, qallunaatut, tuluttut aamma matematikkimi suliaassat.

Imm. 3. Ilinniartitaanermut Naalakkersuisoqarfik suliaassat pillugit ataatsimiititaliamik pilersitsissaaq taassumalu ilinniartunngorniarnermi misiligutissat suliarissava.

Imm. 4. Ilinniartitaanermut Naalakkersuisoqarfik ataatsimiititaliamut allattoqarfeqartitsissaaq.

§ 14. Ilinniartitaanermut Naalakkersuisoqarfimmi misilitsinnissanut aaqqissuisoqassaaq.

Imm. 2. Misilitsinneq qinnuteqartup kommunimi angerlarsimaffiani Piareersarfimmi ingerlanneqassaaq, kisiannili imm. 3 aamma 4 takukkit.

Imm. 3. Ilinniartitaanermut Naalakkersuisoqarfup misilitsinneq qinnuteqartup aalajangersimasumik najugaqarfiani meeqqat atuarfianni ingerlanneqassasoq aalajangersinnaavaa.

Imm. 4. Ilinniartitaanermut Ilisimatusarnermullu Naalakkersuisup misilitsinneq sulisoqarfimmi Naalakkersuisoqarfimmit tassunga atorineqarsinnaasutut akuerineqartumi ingerlanneqassasoq aalajangersinnaavaa.

§ 15. Ilinniarnertuunngorniarluni misilitsinneq ukiut tamaasa Ilinniartitaanermut Naalakkersuisoqarfup ullormi aalajangigaani, tamanullu takusassiarineqartumi ingerlanneqartassaaq, nalinginnaasumik piffissami 1. – 14. aprilimi. Ulloq misilitsiffiusussaq aalajangerneqassaaq tamanullu takusassiarineqarluni kingusinnerpaamik 1. november misilitsinnissaq sioqqullugu.

Imm. 2. Qinnuteqartunut napparsimaneq pissutigalugu allamilluunniit utoqqatsissutaasinnaasumik misilitsissinnaannginnermut peqquteqartut eqqarsaatigalugit nutaamik misilitsittoqassaaq (napparsimasunut ilinniarnertuunngorniarluni misilitsinneq).

Stk. 3. Napparsimaneq uppersaaserneqassaaq nakorsamit allagartakkut, ullormi misilitsiffiusumi suliarineqarsimasukkut. Qinnuteqartoq napparsimasunut ilinniarnertuunngorniarluni misilitsinnissamut inassutigineqarnissaminut piumasaqaatinik naammassinnissimanersoq Ilinniartitaanermut Naalakkersuisoqarfimmi aalajangerneqassaaq.

Imm. 4. Napparsimasunut ilinniarnertuunngorniarluni misilitsinneq ukiut tamaasa ullormi Ilinniartitaanermut Naalakkersuisoqarfup aalajangigaani tamanullu takusassiarisimasaani ingerlanneqartassaaq, nalinginnaasumik piffissami 15.-26. april. Ulloq misilitsiffiusussaq aalajangerneqassaaq tamanullu takusassiarineqarluni kingusinnerpaamik 1. november misilitsinnissaq sioqqullugu.

Kapitali 4

Inissaqartitsineq aamma agguasaarneq

§ 16. Ilinniarnertuunngorniarniit ataasiakkaat tamassumunnga aningaasaliissutini killiliussat aammalu init ilinniartitsiviusut inissaqartitsinermullu periarfissat eqqarsaatigalugit ilinniarniit inissaqartitsinerannut naleqquttunik amerlassusilinnik ilinniartunngortitsisinnaapput, tak. imm. 2.

Imm. 2. Inissat sulisussaqaarnerlu periarfissaqartitsippata, killilimmik amerlanerusut ilinniartunngortinneqarnissaannik ilinniartitaanermut Naalakkersuisoqarfimmit akuersissutigineqarsinnaavoq.

§ 17. Ilinniarnertuunngorniarniit ataasiakkaat ilinniarnertuunngorniarni klassinut holdinullu ilinniartitsineq aqqissuutissavaat.

Imm. 2. Klassi imatut paasineqassaaq, ilinniartinneqartut (ilinniartoqatigiit) 1.semesterip aallartinnerani aammalu ilinniakkap sammivianik ilinniarnernup aallartinnerani pilersinneqartut, tassanilu ilinniartut ataatsimut ilinniakkanik ataatsimut ilinniartinneqarlutik. Klassi aamma pilersinneqarsinnaavoq klassit pioreersut katinnerisigut.

Imm. 3. Holdi imatut paasineqassaaq, ilinniartinneqartut ilinniarnertuunngorniarnimmi qaqugukkulluunniit pilersinneqartut, tassanilu ilinniartut ilinniakkami ataatsimi ataatsimut ilinniartinneqarlutik. Holdit tassaasinnaapput klassimi ataatsimi ilinniartut, klasseqatigiit arlariinneersut arlallit aamma klasseqatigiinnit arlariinneersunit assigiinngitsuneersut.

§ 18. Klassimi ataatsimi holdimilu ataatsimi ilinniartut amerlanerpaamik 24-ussapput, taamaattorli imm. 4 aamma 5 tak.

Imm. 2. Ilinniartut ikinnerpaamik 16-iuppata ilinniarnertuunngorniarniit ataasiakkaat klassimik ataatsimik pilersitsisinnaapput, taamaattorli § 19, imm. 2 tak.

Imm. 3. Ilinniartut ikinnerpaamik arfineq pingasuuppata ilinniarnertuunngorniarniit ataasiakkaat holdimik ataatsimik pilersitsisinnaapput, taamaattorli § 22, imm. 2 tak.

Imm. 4. Inissat aningaasaliissutit iluanni periarfissaqartitsippata ilinniartitaanermut Naalakkersuisoqarfiup killiliussat iluanni imm. 1 sanioqqussinnaavaa, avatangiisinut sulisoqarnermullu tunngasut tamanna periarfissaqartippassuk.

Imm. 5. Tamassuminnga rektorip qinnuteqaateqareerneratigut imm. 2-mi 3-milu ikinnerpaaffissanik piumasaqaatit sanioqqunnissaannik pissutsit immikkut ittut tamatumunnga pissutissaqartitsigaangata ilinniartitaanermut Naalakkersuisoqarfik akuersisinnaavoq.

§ 19. Ilinniartitaanermut Naalakkersuisoqarfimmi agguasaarnermut ataatsimiititaliamik ilinniarnertuunngorniarnilutik qinnuteqarsimasut ilinniartunngortut ataasiakkaat ilinniarnertuunngorniarnimmi sorlermiinnissaannik Naalakkersuisoqarfimmut inassuteqartussanik pilersitsisoqarpoq.

Imm. 2. Agguasaarnermut ataatsimiititaliaq ilinniarnertuunngorniarniit ataasiakkaani rektorimik imaluunniit rektorimit taamatut pinnaatinneqartumik ilaasortalerneqassaaq.

§ 20. Agguaasarnermut ataatsimiititaliap ilinniarnertuunngorniartarneq pillugu Inatsisartut inatsisaanni agguasaarneq pillugu malittarisassat inassuteqaateqarnermini aallaavigissavai.

Imm. 2. Ataatsimiititaliap qinnuteqartut ilinniartunngortinneqartut illoqarfimmi ilinniarnertuunngorniartarneq inissisimaaffigisaata avataani najugaqartut ilinniartut inaanni assigisaanniluunniit ineqarnissamik neqeroorfigineqassasut eqqumaffigissavaa.

Imm. 3. Qinnuteqartut piffissap qinnuteqarfiusup nalaani Kalaallit Nunaanni aalajangersimasumik najugaqanngitsut ilinniartut inaanni najugaqarnissamik neqerooruteqarnermut tunngatillugu Kalaallit Nunaanni kingullermik aalajangersimasumik najugaqarfimminni najugaqartutut isigineqassapput.

Imm. 4. Tamatuttaaq inissat pillugit najoqqutassat Ilinniartitaanermut Naalakkersuisoqarfup aalajangersagarisinnaasai ataatsimiititaliap aammattaaq malissavai.

Imm. 5. Tamatuttaaq 1.semesterip kingorna qinnuteqartut ilinniartunngortinneqartut ilinniakkap sammivianik pituttuutaanngitsumik siumut nalunaarutaat ataatsimiititaliap aammattaaq pingaartissavai, § 4, imm. 5 tak.

Imm. 6. Tamatuttaaq qinnuteqartut tulleriarinermik nalunaarutaat aamma ilinniarnertuunngorniartarneq pillugu Inatsisartut inatsisaanni agguasaarneq pillugu malittarisassat sanioqqunneqarnissaannik immikkut tunngavilersuutigisinnaasaat ataatsimiititaliap aammattaaq pingaartissavai.

Imm. 7. Taamatuttaaq qinnuteqartut ilinniartunngortinneqartut agguarneranni inissat tamarmiusut pitsaanerpaamik atorluarneqarnissaat ataatsimiititaliap aammattaaq anguniassavaa.

§ 21. Agguasaasarnermut ataatsimiititaliap inassuteqaataa kingusinnerpaamik 7. juli Ilinniartitaanermut Naalakkersuisoqarfimmut nassiunneqassaaq.

Imm. 2. Ilinniartut ilinniartunngortinneqartut agguasaasarnermut ataatsimiititaliap inassuteqaataani ilaasut agguarneqarnissaat pillugu Ilinniartitaanermut Naalakkersuisoqarfik kingusinnerpaamik 14. juli aalajangiissaaq. Ilinniarnertuunngorniartarneq ilinniartut ilinniartunngortinneqarfianni rektorip ilinniartut sumi ilinniartunngortinneqarnerannik tamassuma kinguinngua allaganngorlugu nalunaarfigissavai.

Kapitali 5

Naammagittaalliorneq

§ 22. Ilinniarnertuunngorniartarneq ilinniartunngornissaq ilinniartunngoqqinnissarlu pillugit qinnuteqaatit pillugit rektorip aalajangiineri ilinniarnertuunngorniartarneq qinnuteqartut Ilinniartitaanermut Naalakkersuisoqarfimmut naammagittaalliuutigisinnaavaat.

Imm. 2. Qinnuteqartoq angajoqqaatut oqartussaassuseqartunit oqartussaaffigineqarpat angajoqqaatut oqartussaassuseqartut aamma naammagittaalliuuteqarsinnaapput.

§ 23. Naammagittaalliuut rektorimut nassiunneqassaaq, aalajangiinerullu qinnuteqartumut nalunaarutigineqarnerata kingorna kingusinnerpaamik sapaatit akunneri marluk qaangiuppata rektorip tigusiassavaa.

Imm. 2. Suliami oqaaseqaat rektorip suliarissavaa, naammagittaalliorlu oqaaseqaatip sapaatip akunnerata ataatsip iluani oqaaseqaateqarfiginissanut periarfissinneqassaaq. Oqaaseqaat naammagittaalliorlullu oqaaseqaatigisinnaasai ilanngullugit rektorip suliaq Ilinniartitaanermut

Naalakkersuisoqarfimmut tamassuma kingorna ingerlateqqissavaa.

Imm. 3. Rektorip aalajangiinerata allanngortinneqannginnissaa pillugu imm. 1-imi piumasaqaatit eqqortinneqanngippata naammagittaalliutit itigartinneqarnissaanik, naammagittaalliortoq ilalerlugu aalajangiinerup allanngortinneqarnissaanik imaluunniit aalajangiineq suliareqqitassanngorlugu rektorimut uterteqqinnissaanik ilinniartitaanermut Naalakkersuisoqarfik aalajangiisinnaavoq.

Kapitali 6

Atuutilersitsinermut atorunnaarsitsinermullu aalajangersakkat

§ 24. Nalunaarut ulloq 1. august 2022-mi atuutilissaaq.

Imm. 2. Tamanna ilutigalugu ilinniarnertuunngorniartunik ilinniartunngortitsisarneq pillugu Namminersorlutik Oqartussat nalunaarutaat nr. 3, 31. januar 2013-imeersoq atorunnaarsinneqarpoq.

Namminersorlutik Oqartussat, ulloq 5. juli 2022

Peter Olsen

Ilinniartitaanermut, Kultureqarnermut, Timersornermut Ilageeqarnermullu Naalakkersuisoq

/ Karsten Peter Jensen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

